

The background is a traditional Chinese ink wash painting. It depicts a misty, blue-toned landscape. In the foreground, there are dark, gnarled tree branches. In the middle ground, a small boat with a yellow figure is visible on the water. The sky is filled with soft, white mist and several birds in flight. The overall mood is serene and contemplative.

佛教菩提道哲學專題

第8週 2020/04/24

菩薩、摩訶薩、被大乘鎧、大乘相

《大般若波羅蜜多經．第二會．念住等品第十七》

復次，善現！菩薩摩訶薩大乘相者，謂四念住。云何為四？一、身念住。二、受念住。三、心念住。四、法念住。

身念住者，謂菩薩摩訶薩修行般若波羅蜜多時，以無所得而為方便，雖於內身。住循身觀，或於外身。住循身觀，或於內外身。住循身觀，而永不起身俱尋思，熾然精進，正知具念，調伏貪憂。

受念住者，謂菩薩摩訶薩修行般若波羅蜜多時，以無所得而為方便，雖於內受住循受觀，或於外受住循受觀，或於內外受住循受觀，而永不起受俱尋思，熾然精進，正知具念，調伏貪憂。

心念住者，謂菩薩摩訶薩修行般若波羅蜜多時，以無所得而為方便，雖於內心住循心觀，或於外心住循心觀，或於內外心住循心觀，而永不起心俱尋思，熾然精進，正知具念，調伏貪憂。

法念住者，謂菩薩摩訶薩修行般若波羅蜜多時，以無所得而為方便，雖於內法住循法觀，或於外法住循法觀，或於內外法住循法觀，而永不起法俱尋思，熾然精進，正知具念，調伏貪憂。

云何菩薩摩訶薩修行般若波羅蜜多時，以無所得而為方便，於內身．住循身觀，熾然精進，正知具念，調伏貪憂？

善現！若菩薩摩訶薩修行般若波羅蜜多時，以無所得而為方便，審觀自身，行時．知行，住時．知住，坐時．知坐，臥時．知臥。如如．自身威儀差別，如是如是．熾然精進，正知具念，調伏貪憂。是為菩薩摩訶薩修行般若波羅蜜多時，以無所得而為方便，於內身．住循身觀，熾然精進，正知具念，調伏貪憂。

復次，善現！若菩薩摩訶薩修行般若波羅蜜多時，以無所得而為方便，審觀自身，正知往來，正知瞻顧，正知俯仰，正知屈伸，服僧伽胝，執持衣鉢，若食若飲，偃息經行，坐起承迎，寤寐語默，入出諸定，皆念正知。是為菩薩摩訶薩修行般若波羅蜜多時，以無所得而為方便，於內身。住循身觀，熾然精進，正知具念，調伏貪憂。

復次，善現！若菩薩摩訶薩修行般若波羅蜜多時，以無所得而為方便，審觀自身，於息入時。念知息入，於息出時。念知息出，於息長時。念知息長，於息短時。念知息短。如轉輪師或彼弟子，輪勢長時。知輪勢長，輪勢短時。知輪勢短。是菩薩摩訶薩亦復如是，念知諸息若入若出長短差別。是為菩薩摩訶薩修行般若波羅蜜多時，以無所得而為方便，於內身。住循身觀，熾然精進，正知具念，調伏貪憂。

復次，善現！若菩薩摩訶薩修行般若波羅蜜多時，以無所得而為方便，審觀自身諸界差別，所謂地界、水、火、風界。如巧屠師或彼弟子，斷牛命已，復用利刀分析其身，割為四分，若坐若立如實觀知。是菩薩摩訶薩亦復如是，觀察自身地、水、火、風四界差別。是為菩薩摩訶薩修行般若波羅蜜多時，以無所得而為方便，於內身住循身觀，熾然精進，正知具念，調伏貪憂。

復次，善現！若菩薩摩訶薩修行般若波羅蜜多時，以無所得而為方便，審觀自身，從足至頂，種種不淨充滿其中，外為薄皮之所纏裹，所謂此身唯有種種髮毛爪齒、皮革血肉、筋脈骨髓、心肝肺腎、脾膽胞胃、大腸小腸、屎尿涕唾、涎淚垢汗、痰膿肪[月*冊]、腦膜、[月*(嵐-几)]聾，如是不淨充滿身中。如有農夫或諸長者，倉中盛滿種種雜穀，所謂稻、麻、粟、豆、麥等；有明目者，開倉覩之，能如實知其中唯有稻、麻、粟等種種雜穀。是菩薩摩訶薩亦復如是，審觀自身，從足至頂，不淨充滿，不可貪樂。是為菩薩摩訶薩修行般若波羅蜜多時，以無所得而為方便，於內身。住循身觀，熾然精進，正知具念，調伏貪憂。

復次，善現！若菩薩摩訶薩修行般若波羅蜜多時，以無所得而為方便，往澹泊路，觀所棄屍，死經一日，或經二日，乃至七日，其身臃脹，色變青瘀，臭爛皮穿，膿血流出。見是事已，自念我身有如是性，具如是法，未得解脫終歸如是。是為菩薩摩訶薩修行般若波羅蜜多時，以無所得而為方便，於內身。住循身觀，熾然精進，正知具念，調伏貪憂。

復次，善現！若菩薩摩訶薩修行般若波羅蜜多時，以無所得而為方便，往澹泊路，觀所棄屍，死經一日，或經二日，乃至七日，為諸鷗、鷺、烏、鵲、鷄、梟、虎、豹、狐、狼、野干、狗等種種禽獸，或啄或攫，骨肉狼籍，[齒*查]掣食噉。見是事已，自念我身有如是性，具如是法，未得解脫終歸如是。是為菩薩摩訶薩修行般若波羅蜜多時，以無所得而為方便，於內身。住循身觀，熾然精進，正知具念，調伏貪憂。

復次，善現！若菩薩摩訶薩修行般若波羅蜜多時，以無所得而為方便，往澹泊路，觀所棄屍，禽獸食已，不淨潰爛，膿血流離，有無量種蟲蛆雜出，臭穢可污，過於死狗。見是事已，自念我身有如是性，具如是法，未得解脫終歸如是。是為菩薩摩訶薩修行般若波羅蜜多時，以無所得而為方便，於內身住循身觀，熾然精進，正知具念，調伏貪憂。

復次，善現！若菩薩摩訶薩修行般若波羅蜜多時，以無所得而為方便，往澹泊路，觀所棄屍，蟲蛆食已，肉離骨現，支節相連，筋纏血塗，尚餘腐肉。見是事已，自念我身有如是性，具如是法，未得解脫終歸如是。是為菩薩摩訶薩修行般若波羅蜜多時，以無所得而為方便，於內身住循身觀，熾然精進，正知具念，調伏貪憂。

復次，善現！若菩薩摩訶薩修行般若波羅蜜多時，以無所得而為方便，往澹泊路，觀所棄屍，已成骨瑣，血肉都盡，餘筋相連。見是事已，自念我身有如是性，具如是法，未得解脫終歸如是。是為菩薩摩訶薩修行般若波羅蜜多時，以無所得而為方便，於內身。住循身觀，熾然精進，正知具念，調伏貪憂。

復次，善現！若菩薩摩訶薩修行般若波羅蜜多時，以無所得而為方便，往澹泊路，觀所棄屍，但餘眾骨，其骨皓白色如珂雪，諸筋糜爛支節分離。見是事已，自念我身有如是性，具如是法，未得解脫終歸如是。是為菩薩摩訶薩修行般若波羅蜜多時，以無所得而為方便，於內身。住循身觀，熾然精進，正知具念，調伏貪憂。

復次，善現！若菩薩摩訶薩修行般若波羅蜜多時，以無所得而為方便，往澹泊路，觀所棄屍，成白骨已，支節分散，零落異方。見是事已，自念我身有如是性，具如是法，未得解脫終歸如是。是為菩薩摩訶薩修行般若波羅蜜多時，以無所得而為方便，於內身住循身觀，熾然精進，正知具念，調伏貪憂。

復次，善現！若菩薩摩訶薩修行般若波羅蜜多時，以無所得而為方便，往澹泊路，觀所棄屍，諸骨分離，各在異處，足骨異處，腓骨異處，膝骨異處，髌骨異處，髓骨異處，脊骨異處，脇骨異處，胸骨異處，膊骨異處，臂骨異處，手骨異處，項骨異處，頷骨異處，頰骨異處，其髑髏骨亦在異處。見是事已，自念我身有如是性，具如是法，未得解脫終歸如是。是為菩薩摩訶薩修行般若波羅蜜多時，以無所得而為方便，於內身住循身觀，熾然精進，正知具念，調伏貪憂。

復次，善現！若菩薩摩訶薩修行般若波羅蜜多時，以無所得而為方便，往澹泊路，觀所棄屍，骸骨狼籍，風吹日曝，雨灌霜封，積有歲年，色如珂雪。見是事已，自念我身有如是性，具如是法，未得解脫終歸如是。是為菩薩摩訶薩修行般若波羅蜜多時，以無所得而為方便，於內身住循身觀，熾然精進，正知具念，調伏貪憂。

復次，善現！若菩薩摩訶薩修行般若波羅蜜多時，以無所得而為方便，往澹泊路，觀所棄屍，餘骨散地，經多百歲，或多千年，其相變青，狀如鴿色，或有腐朽碎末如塵，與土相和難可分別。見是事已，自念我身有如是性，具如是法，未得解脫終歸如是。是為菩薩摩訶薩修行般若波羅蜜多時，以無所得而為方便，於內身住循身觀，熾然精進，正知具念，調伏貪憂。

善現！諸菩薩摩訶薩修行般若波羅蜜多時，以無所得而為方便，如於內身，如是差別住循身觀，熾然精進，正知具念，調伏貪憂；於外身，住循身觀，於內外身，住循身觀，熾然精進，正知具念，調伏貪憂，隨其所應亦復如是。

善現！諸菩薩摩訶薩修行般若波羅蜜多時，以無所得而為方便，於內外俱受、心、法，住循受、心、法觀，熾然精進，正知具念，調伏貪憂，隨其所應皆應廣說。

善現！如是菩薩摩訶薩修行般若波羅蜜多時，以無所得而為方便，於內外俱身、受、心、法，住循身、受、心、法觀時，雖作是觀而無所得。善現！當知，是為菩薩摩訶薩大乘相。

復次，善現！菩薩摩訶薩大乘相者，謂四正斷。云何為四？善現！若菩薩摩訶薩修行般若波羅蜜多時，以無所得而為方便，於諸未生惡不善法。為不生故，生欲策勵，發起正勤策心持心，是為第一。若菩薩摩訶薩修行般若波羅蜜多時，以無所得而為方便，於諸已生惡不善法。為永斷故，生欲策勵，發起正勤策心持心，是為第二。若菩薩摩訶薩修行般若波羅蜜多時，以無所得而為方便，未生善法。為令生故，生欲策勵，發起正勤策心持心，是為第三。若菩薩摩訶薩修行般若波羅蜜多時，以無所得而為方便，已生善法。為令安住不忘增廣倍修滿故，生欲策勵，發起正勤策心持心，是為第四。善現！當知。是為菩薩摩訶薩大乘相。

復次，善現！菩薩摩訶薩大乘相者，謂四神足。云何為四？善現！若菩薩摩訶薩修行般若波羅蜜多時，以無所得而為方便，修欲三摩地斷行成就神足，依離、依無染、依滅、迴向捨，是為第一。若菩薩摩訶薩修行般若波羅蜜多時，以無所得而為方便，修勤三摩地斷行成就神足，依離、依無染、依滅、迴向捨，是為第二。若菩薩摩訶薩修行般若波羅蜜多時，以無所得而為方便，修心三摩地斷行成就神足，依離、依無染、依滅、迴向捨，是為第三。若菩薩摩訶薩修行般若波羅蜜多時，以無所得而為方便，修觀三摩地斷行成就神足，依離、依無染、依滅、迴向捨，是為第四。善現！當知。是為菩薩摩訶薩大乘相。

復次，善現！菩薩摩訶薩大乘相者，謂五根。云何為五？善現！若菩薩摩訶薩修行般若波羅蜜多時，以無所得而為方便，所修信根、精進根、念根、定根、慧根。善現！當知。是為菩薩摩訶薩大乘相。

復次，善現！菩薩摩訶薩大乘相者，謂五力。云何為五？善現！若菩薩摩訶薩修行般若波羅蜜多時，以無所得而為方便，所修信力、精進力、念力、定力、慧力。善現！當知。是為菩薩摩訶薩大乘相。

復次，善現！菩薩摩訶薩大乘相者，謂七等覺支。云何為七？善現！若菩薩摩訶薩修行般若波羅蜜多時，以無所得而為方便，所修念等覺支、擇法等覺支、精進等覺支、喜等覺支、輕安等覺支、定等覺支、捨等覺支，依離、依無染、依滅、迴向捨。善現！當知。是為菩薩摩訶薩大乘相。

復次，善現！菩薩摩訶薩大乘相者，謂八聖道支。云何為八？善現！若菩薩摩訶薩修行般若波羅蜜多時，以無所得而為方便，所修正見、正思惟、正語、正業、正命、正精進、正念、正定，依離、依無染、依滅、迴向捨。善現！當知。是為菩薩摩訶薩大乘相。

復次，善現！菩薩摩訶薩大乘相者，謂三三摩地。云何為三？善現！若菩薩摩訶薩修行般若波羅蜜多時，以無所得而為方便，觀一切法自相皆空，其心安住，名空解脫門，亦名空三摩地，是為第一。若菩薩摩訶薩修行般若波羅蜜多時，以無所得而為方便，觀一切法自相空故皆無有相，其心安住，名無相解脫門，亦名無相三摩地，是為第二。若菩薩摩訶薩修行般若波羅蜜多時，以無所得而為方便，觀一切法自相空故皆無所願，其心安住，名無願解脫門，亦名無願三摩地，是為第三。善現！當知。是為菩薩摩訶薩大乘相。

復次，善現！菩薩摩訶薩大乘相者，謂十一智。云何十一？謂法智、類智、他心智、世俗智、苦智、集智、滅智、道智、盡智、無生智、如說智。

云何法智？善現！若智以無所得而為方便，知五蘊差別相，是為法智。

云何類智？善現！若智以無所得而為方便，知眼乃至意、色乃至法皆是無常，是為類智。

云何他心智？善現！若智以無所得而為方便，知他有情心、心所法無所疑滯，是為他心智。

云何世俗智？善現！若智以無所得而為方便，知諸有情修行差別，是為世俗智。

云何苦智？善現！若智以無所得而為方便，知苦應不生，是為苦智。

云何集智？善現！若智以無所得而為方便，知集應永斷，是為集智。

云何滅智？善現！若智以無所得而為方便，知滅應作證，是為滅智。

云何道智？善現！若智以無所得而為方便，知道應修習，是為道智。

云何盡智？善現！若智以無所得而為方便，知貪、瞋、癡盡，是為盡智。

云何無生智？善現！若智以無所得而為方便，知諸有趣永不復生，是為無生智。

云何如說智？善現！如來所有一切相智，是為如說智。

善現！當知。是為菩薩摩訶薩大乘相。

復次，善現！菩薩摩訶薩大乘相者，謂三根：一、未知當知根，二、已知根，三、具知根。

云何未知當知根？善現！若諸有學補特伽羅，於諸聖諦未已現觀，所有信根、精進根、念根、定根、慧根，是為未知當知根。

云何已知根？善現！若諸有學補特伽羅，於諸聖諦已得現觀，所有信根、精進根、念根、定根、慧根，是為已知根。

云何具知根？善現！謂諸無學補特伽羅，若阿羅漢、若獨覺、若已住十地菩薩摩訶薩、若諸如來。應。正等覺，所有信根、精進根、念根、定根、慧根，是為具知根。

善現！若此三根，以無所得為方便者，當知是為菩薩摩訶薩大乘相。

復次，善現！菩薩摩訶薩大乘相者，謂三三摩地。云何為三？
一、有尋有伺三摩地。二、無尋唯伺三摩地。三、無尋無伺三摩地。

云何有尋有伺三摩地？善現！若離欲惡不善法，有尋有伺，離．生喜樂，入初靜慮具足住，是為有尋有伺三摩地。

云何無尋唯伺三摩地？善現！若初靜慮、第二靜慮中間定，是為無尋唯伺三摩地。

云何無尋無伺三摩地？善現！若第二靜慮乃至非想非非想處定，是為無尋無伺三摩地。

善現！若此三種，以無所得為方便者，當知是為菩薩摩訶薩大乘相。

復次，善現！菩薩摩訶薩大乘相者，謂十隨念。云何為十？謂佛隨念、法隨念、僧隨念、戒隨念、捨隨念、天隨念、寂靜隨念、入出息隨念、身隨念、死隨念。善現！若此十種，以無所得為方便者，當知是為菩薩摩訶薩大乘相。

復次，善現！菩薩摩訶薩大乘相者，謂四靜慮、四無量、四無色定、八解脫、九次第定等所有善法，以無所得為方便者，當知是為菩薩摩訶薩大乘相。

復次，善現！菩薩摩訶薩大乘相者，謂如來十力。云何為十？

善現！若無所得而為方便，如實了知。因果等法。處非處相，是為第一。

善現！若無所得而為方便，如實了知。諸有情類過去、未來、現在。種種諸業法受因果別相，是為第二。

若無所得而為方便，如實了知。世間。非一種種界相，是為第三。


若無所得而為方便，如實了知。諸有情類。非一勝解。種種勝解，是為第四。

若無所得而為方便，如實了知。諸有情類。諸根勝劣，是為第五。

若無所得而為方便，如實了知。遍行行相，是為第六。

若無所得而為方便，如實了知。諸有情類。根、力、覺支、解脫、靜慮、等持、等至、染淨差別，是為第七。

若無所得而為方便，如實了知。諸有情類。有無量種。宿住差別，是為第八。



若無所得而為方便，如實了知。諸有情類。有無量種。死生差別，是為第九。

若無所得而為方便，如實了知。諸漏永盡，得無漏心解脫，得無漏慧解脫，於現法中，自作證。具足住，能正了知。我生已盡、梵行已立、所作已辦、不受後有，是為第十。

善現！當知。是為菩薩摩訶薩大乘相。



復次，善現！菩薩摩訶薩大乘相者，謂四無所畏。云何為四？

善現！若無所得而為方便，自稱，我是正等覺者。設有沙門、若婆羅門、若天魔梵、或餘世間，依法立難，及令憶念，言．於是法．非正等覺。我於彼難，正見無因。以於彼難見無因故，得安隱住，無怖無畏，自稱．我處大仙尊位，於大眾中，正師子吼，轉妙梵輪。其輪清淨，正真無上，一切沙門、若婆羅門、若天魔梵、或餘世間，皆無有能如法轉者。是為第一。

善現！若無所得而為方便，自稱，我已永盡諸漏。設有沙門、若婆羅門、若天魔梵、或餘世間，依法立難，及令憶念，言．如是漏．未得永盡。我於彼難，正見無因。以於彼難見無因故，得安隱住，無怖無畏，自稱，我處大仙尊位，於大眾中，正師子吼，轉妙梵輪。其輪清淨，正真無上，一切沙門、若婆羅門、若天魔梵、或餘世間，皆無有能如法轉者。是為第二。

善現！若無所得而為方便，為諸弟子說障道法。設有沙門、若婆羅門、若天魔梵、或餘世間，依法立難，及令憶念，言。習此法。不能障道。我於彼難，正見無因。以於彼難見無因故，得安隱住，無怖無畏，自稱，我處大仙尊位，於大眾中，正師子吼，轉妙梵輪。其輪清淨，正真無上，一切沙門、若婆羅門、若天魔梵、或餘世間，皆無有能如法轉者。是為第三。

善現！若無所得而為方便，為諸弟子說盡苦道。設有沙門、若婆羅門、若天魔梵、或餘世間，依法立難，及令憶念，言。修此道。不能盡苦。我於彼難，正見無因。以於彼難見無因故，得安隱住，無怖無畏，自稱，我處大仙尊位，於大眾中，正師子吼，轉妙梵輪。其輪清淨，正真無上，一切沙門、若婆羅門、若天魔梵、或餘世間，皆無有能如法轉者。是為第四。

善現！當知。是為菩薩摩訶薩大乘相。

復次，善現！菩薩摩訶薩大乘相者，謂四無礙解。云何為四？
一、義無礙解。二、法無礙解。三、詞無礙解。四辯無礙解。善現！
如是四無礙解，若無所得而為方便，當知是為菩薩摩訶薩大乘相。

復次，善現！菩薩摩訶薩大乘相者，謂十八佛不共法。云何十八？善現！謂諸如來。應。正等覺，常無誤失，無卒暴音，無忘失念，無種種想，無不定心，無不擇捨，志欲無退，精進無退，念無退，慧無退，解脫無退，解脫智見無退，一切身業智為前導隨智而轉，一切語業智為前導隨智而轉，一切意業智為前導隨智而轉，於過去世所起智見無著無礙，於未來世所起智見無著無礙，於現在世所起智見無著無礙。善現！如是十八佛不共法，無不皆以無所得為方便，當知是為菩薩摩訶薩大乘相。


復次，善現！菩薩摩訶薩大乘相者，謂陀羅尼門。何等陀羅尼門？謂字平等性、語平等性、入諸字門。云何字平等性、語平等性、入諸字門？

善現！若菩薩摩訶薩修行般若波羅蜜多時，以無所得而為方便，入哀字門，悟一切法本不生故；入洛字門，悟一切法離塵垢故；入跛字門，悟一切法勝義教故；入者字門，悟一切法無死生故；入娜字門，悟一切法遠離名相無得失故；入砢字門，悟一切法出世間故愛支條緣永被害故；入柁字門，悟一切法調伏寂靜真如平等無分別故；入婆字門，悟一切法離縛解故；入茶字門，悟一切法離熱矯穢得清淨故；入沙字門，悟一切法無罣礙故；入縛字門，悟一切法語音道斷故；入頽字門，悟一切法真如不動故；入也字門，悟一切法如實不生故；入瑟吒字門，悟一切法制伏任持相不可得故；入迦字門，悟一切法作者不可得故；

入娑字門，悟一切法時平等性不可得故；入磨字門，悟一切法我所執性不可得故；入伽字門，悟一切法行動取性不可得故；入他字門，悟一切法所依處性不可得故；入闍字門，悟一切法能所生起不可得故；入濕縛字門，悟一切法安隱之性不可得故；入達字門，悟一切法能持界性不可得故；入捨字門，悟一切法寂靜性不可得故；入佉字門，悟一切法如虛空性不可得故；入羸字門，悟一切法窮盡性不可得故；入薩[多*頁]字門，悟一切法任持處非處令不動轉性不可得故；入若字門，悟一切法所了知性不可得故；入刺他字門，悟一切法執著義性不可得故；入呵字門，悟一切法能為因性不可得故；入薄字門，悟一切法可破壞性不可得故；入縛字門，悟一切法欲樂覆性不可得故；入颯磨字門，悟一切法可憶念性不可得故；入嗑縛字門，悟一切法可呼召性不可得故；

入蹉字門，悟一切法勇健性不可得故；入鍵字門，悟一切法厚平等性不可得故；入攄字門，悟一切法積集性不可得故；入拏字門，悟一切法離諸諍諍無往無來行住坐臥不可得故；入頗字門，悟一切法遍滿果報不可得故；入塞迦字門，悟一切法聚積蘊性不可得故；入逸娑字門，悟一切法衰老性相不可得故；入酌字門，悟一切法聚集足迹不可得故；入吒字門，悟一切法相驅迫性不可得故；入擇字門，悟一切法究竟處所不可得故。

善現！此擇字門，是能悟入法空邊際。除此諸字，表諸法空，更不可得。何以故？此諸字義，不可宣說，不可顯示，不可書持，不可執取，不可觀察，離諸相故。善現！譬如虛空，是一切物所歸趣處。此諸字門，亦復如是。諸法空義，皆入此門，方得顯了。

The background features decorative floral patterns in a light beige or gold color. In the top left, there is a large, stylized flower with many petals. In the bottom right, there is another large, stylized flower with a more complex, multi-layered petal structure. The overall aesthetic is clean and elegant, typical of a traditional Chinese or Buddhist-themed presentation.

善現！入此[褒-保+可]字等，名入諸字門。善現！諸菩薩摩訶薩若於如是入諸字門得善巧智，於諸言音所詮、所表皆無罣礙，於一切法平等空性盡能證持，於眾言音咸得善巧。

善現！若菩薩摩訶薩能聽如是入諸字門印相、印句，聞已受持、讀誦、通利、為他解說，不徇名譽利養恭敬，由此因緣得二十種功德勝利。

云何二十？謂得強憶念，得勝慚愧，得堅固力，得法旨趣，得增上覺，得殊勝慧，得無礙辯，得總持門，得無疑惑，得違順語不生恚愛，得無高下平等而住，得於有情言音善巧，得蘊善巧、界善巧、處善巧、諦善巧，得緣起善巧、因善巧、緣善巧、法善巧，得根勝劣智善巧、他心智善巧，得觀星曆善巧，得天耳智善巧、宿住隨念智善巧、神境智善巧、死生智善巧，得漏盡智善巧，得說處非處智善巧，得往來智善巧、威儀路善巧。善現！是為得二十種功德勝利。

善現！若菩薩摩訶薩修行般若波羅蜜多時，以無所得而為方便，所得如是陀羅尼門，當知是為菩薩摩訶薩大乘相。